

# Quai ch'ins aveva supponì è daventà realitad

Il gaud dal Partenz e dal Signuradi è donnegià fitg pervi da la preschientscha da la selvaschina. Il chantun sto prender perquai mesiras urgentas. Il selvicultur chantunal Urban Maissen prenda posiziun e declera co ch'ins vul reparar las parts problematicas dal gaud. E co ch'il gaud duai sa mantegnair en vista a la midada dal clima.

MARTIN GABRIEL/FMR

Il rapport dal gaud e da la selvaschina dal Partenz e dal Signuradi è il segund rapport actual, suenter il rapport per la Surselva dal 2018. Ils rapports da las autras regiuns grischunas cumparan proximamain en diversas etappas. Il mader da l'Uffizi chantunal da gaud e privels da la natira, *Urban Maissen*, enconuscha la situaziun reala dal gaud grischun. Il rapport scientific furnescha uss ina survista detagliada. Quitads sa fa Urban Maissen per il gaud da protecciun che protegia la populaziun muntagnarda da lavinias, bovas e crappa.

**FMR: La situaziun en duas grondas regiuns dal Grischun, il Partenz ed il Signuradi, è tut autra che buna. Co vulais vos reparar quels donns vi dal pign, il ruver, l'aviez, l'ischi ed il tigl?**

**Urban Maissen:** En emprima lingua stuain nus intensiviar la chatscha en quels gauds. Damain selvaschina chaschuna automaticamain damain donns al gaud regiuvina. Il segund punct è ina tgira pli concentrada dal gaud. Nus vulain stgaffir lieus da regiuvinaziun, nua che las plantas pon crescer. Pli bera regiuvinaziun ch'i dat en il gaud e pli pitschens èn ils donns da la selvaschina tar las singulas plantinas. Ed il terz punct è da procurar che la selvaschina na vegnia betg disturbada memia fitg da persunas entras activitads en il liber. Causa quels disturbis vegn la selvaschina numnadamain tgatschada en il gaud.

**Èn questas finamiras realistics e cuntanschiblas?**

Tant l'Uffizi da chatscha e pestga sco er nus dal gaud savain che nus stuain collavurar stretgamain, uschiglio na cuntanschain nus betg las finamiras. Perquai avain nus gi discurs intensivis er cun ils chatschaders e cun las vischnancas dal Partenz e dal Signuradi ch'èn proprietarias dal gaud. Ils resultats da tut ils discurs laschan sperar da survegnir in bun sustegniment.

**Quant schlet statti cun il gaud en l'entir chantun?**

La situaziun da regiuvinaziun n'è betg cuntentaivla en las regiuns da la Val dal Rain grischuna, dal Signuradi e dal Partenz, ma er en la Tumleasta e sin la Mantogna. Quitads fa



Il selvicultur chantunal Urban Maissen explitgescha las surfatschas problematicas. FOTO MAD

la situaziun dal gaud er en tschertas valladas dal sid. En l'Engiadina ed en parts da la Surselva funcziunescha la regiuvinaziun bain. Dentant pon ins er constatar che 56% da la surfatscha forestala, damai da las plantas creschidas, è stabila ed ademplescha sia funcziun da protecciun. Propi labila è be ina fitg pitschna part da la surfatscha forestala. Per il mument pon ins dir ch'il gaud da noss chantun adempleschia anc per gronda part sia funcziun. Quai pudess dentant sa midar svelt, sche nus na dain betg a las plantinas giuvnas la schanza da crescer.

**Cun cumparegliar fotografias or da l'aria d'ina regiun sursilvana cun las medemas fotografias dals onns 1930, han ins l'im-**

**«Nus stuain intensiviar la chatscha en quels gauds.»**

Urban Maissen, selvicultur chantunal

**«La midada dal clima cumenza er d'influenzar la sanadad dal gaud.»**


Urban Maissen, selvicultur chantunal

**pressiun che quellas cuntradas hajan dapli gaud ussa che avant 90 onns. Cugliuna questa impressiun?**

Na, igl è effectivamain uschia che la cuntrada crescha en. Cunzunt en tschertas regiuns periferas pauc populadas è quai uschia. Quai ha dentant er da far cun il diever entras l'agricultura. Là nua che cuntradas na vegnan betg pli cultivadas e tgiradas da l'agricultura, è il privel grond che quels intschess creschan en. Gea, sin tschertas fotografias or da l'aria pudess ins avair l'impressiun ch'igl haja oz dapli gaud.

**Co statti atgnamain cun donns entras la midada dal clima?**

La midada dal clima cumenza er d'influenzar la sanadad dal gaud. En lieus nua che nus avain oz anc las plantas da gaud tradiziunals, sco pign, tigl, aviez, ruver u ischi, vegnin nus en il futur a regiuvinar be pli cun plantas da feglia. Sch'ins vul anticipar questa situaziun, lura na datti nagut auter che da far in plan per il gaud dal futur. In plan cun la filosofia da remplazzar plantas da guglias cun plantas da feglia. Ina gronda sfida è d'enconuscher las plantas da feglia che vegnan a frida il meglier cun las midadas dal clima en il territori muntagnard. Qua avain nus bunas simulaziuns, e cun quellas pudain nus lavarar. Dentant na vegn il pign tradiziunal mai a sparir per adina dal gaud grischun.



Donn da scursar entras selvaschina en in gaud da lareschs a Luzein.

FOTO MAD/BURTEL JUON

## Gronds donns dal gaud da protecciun

Il chantun Grischun sto agir urgentamain per ch'il gaud da protecciun en il Signuradi ed il Partenz possia sa regiuvinar ed er en il futur ademplir sia funcziun. Ils donns da la selvaschina èn numnadamain gronds en quellas duas regiuns - ed ils donns èn s'augmentads marcantamain ils ultims onns. Quai mussa il rapport da gaud e selvaschina da la regiun dal 2019 ch'il chantun ha preschentà venderdi a Clastra-Monbiel a la publicitad.

### 60% «surfatscha problematica»

Prest 60% da la surfatscha dal gaud da protecciun en il Signuradi ed il Partenz taxescha il chantun da nov sco «surfatscha problematica». Raschun èn ils donns che tshiervs, chavriels e chamutschs fan. Quai è dubel uschè bler sco quai ch'ins aveva anc constatà en l'ultim rapport il 2006. Ils problems èn tenor il chantun per part uschè acuts, ch'el sto prender mesiras urgentas en la mesadad da tut quellas surfatschas.

### Mesiras da protecciun

Tut tenor lieu sa differenzieschian quellas mesiras in zic ina da l'autra. Da principi vul il chantun dentant meglier la situaziun cun cumbinar mesiras forestalas, mesiras da chatscha e quellas ch'influenzeschan il spazi da viver. Uschia vul el per exempel far dapli saivs da protecciun, tegnair vinavant aut il dumber da tshiervs che duain vegnir sajettads per onn u era evitar ils disturbis dal carstgaun curt avant u durant la chatscha.

Tge che tut questas mesiras portan la fin finala e sch'ellas ston anc vegnir adattadas, vegn il chantun a controllar il pli tard en trais onns.